



Հաստատված է՝

Հայաստանի Հանրապետության փաստաբանների
պալատի նախագահի 21.06.2022թ. թիվ 134-Լ որոշմամբ

* * * * *

Կ Ա Ր Գ

«80 ՓԱՍՏԱԲԱՆԻ «ՓԱՍՏԱԲԱՆ ԵԶԵԳԵԼՅԱՆ ՕԺԱՆԴԱԿՈՒԹՅՈՒՆ» ՏՐԱՄԱԴՐԵԼՈՒ ՄԱՍԻՆ»

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգն ընդունվել է «Փաստաբանության մասին» Հայաստանի Հանրապետության օրենքի (**այսուհետ՝ Օրենք**) 13-րդ հոդվածի ութերորդ մասի պահանջին համապատասխան և սահմանում է Հայաստանի Հանրապետության փաստաբանների պալատի (**այսուհետ՝ Պալատ**) կողմից բարերար Ռայմոն Եզեգեյանից (**այսուհետ՝ Բարերար**) տրամադրվող նվիրաբերության (**այսուհետ՝ «Փաստաբան Եզեգեյան օժանդակություն»**) գումարի տնօրինման հետ կապված հարաբերությունները:
2. «Փաստաբան Եզեգեյան օժանդակության» շահառու է համարվում սույն կարգին համապատասխան որոշված փաստաբանը (**այսուհետ՝ Շահառու**):
3. Շահառուների քանակը չի կարող գերազանցել **80-ը (ութսուն)** (**այսուհետ՝ Շահառուների քանակ**):
4. «Փաստաբան Եզեգեյան օժանդակությունը» նախատեսում է մեկ Շահառուի համար մեկ տարվա անդամավճարի վճարում, որպես կանխավճար:

* * *

II. ՇԱՀԱՌՈՒՆԵՐԻՆ ՈՐՈՇԵԼՈՒ ԿԱՐԳԸ

5. Շահառուներին որոշելու համար ձևավորվում է ժամանակավոր հանձնաժողով (**այսուհետ՝ Հանձնաժողով**) հետևյալ կազմով՝
 - 1) Պալատի աշխատակազմի ղեկավար,
 - 2) Պալատի նախագահի գլխավոր խորհրդական,
 - 3) Պալատի ընդհանուր դեպարտամենտի ղեկավար,

- 4) Պալատի գանձապահ:
6. Հանձնաժողովը՝
- 1) ստուգում է Շահառուների թեկնածուների համապատասխանությունը սույն կարգի պահանջներին.
 - 2) հաստատում է Շահառուների ցանկը և ներկայացնում է Պալատի ֆինանսական տնօրենին:
7. Շահառուներին որոշելու համար Հանձնաժողովն՝ ըստ ստորև նշված առաջնահերթության, նախապատվությունը տալիս է հետևյալ պահանջներին համապատասխանող փաստաբաններին՝
- 1) 60-69 տարեկան փաստաբաններին՝ ովքեր չունեն մշտական աշխատանք, **ոչ ավել, քան 10 (տասը) փաստաբան:** Այս խմբում նախապատվությունը տրվում է տարիքով ավագ փաստաբաններին.
 - 2) 2-րդ կամ 3-րդ կարգի հաշմանդամություն ունեցող փաստաբաններին՝ **ոչ ավել, քան 10 (տասը) փաստաբան:** Այս խմբում նախապատվությունը տրվում է առավել վաղ հաշմանդամության կարգ ստացած փաստաբաններին.
 - 3) միայնակ մայր հանդիսացող փաստաբաններին՝ **ոչ ավել, քան 8 (ութ) փաստաբան:** Սույն կարգի իմաստով միայնակ մայր է համարվում ամուսնության մեջ չգտնվող այն կինը, ում խնամքի տակ գտնվում է առնվազն մեկ անչափահաս երեխա, որի ծննդյան վկայականում **(ա)** բացակայում է երեխայի հոր մասին գրանցումը, կամ, **(բ)** երեխայի հոր մասին գրանցումը կատարվել է ՀՀ օրենսդրությամբ սահմանված կարգով՝ մոր ցուցումով, կամ, **(գ)** երեխայի հայրը մահացել է, կամ **(դ)** ՀՀ օրենսդրությամբ սահմանված կարգով երեխայի հայրը ճանաչվել է անհայտ բացակայող կամ հայտարարվել է մահացած: Այս խմբում նախապատվությունը տրվում է առավել շատ երեխա ունեցող, իսկ երեխաների հավասար քանակի դեպքում՝ տարիքով կրտսեր երեխա ունեցող փաստաբաններին.
 - 4) ընտանիքում պարտադիր զինվորական ծառայության զորակոչված (զինվորական ծառայության մեջ գտնվող) զավակ ունեցող փաստաբաններին՝ **ոչ ավել, քան 7 (յոթ) փաստաբան:** Այս խմբում նախապատվությունը տրվում է՝ **(ա)** ընտանիքում մեկից ավելի զինծառայող ունեցող փաստաբաններին կամ **(բ)** զինվորական ծառայության առավել ուշ զորակոչված զորակոչիկ ունեցող փաստաբաններին.
 - 5) նյութական դժվարություններ ունեցող մարզի փաստաբաններին՝ **ոչ ավել, քան 10 (տասը) փաստաբան,** յուրաքանչյուր մարզից մեկ փաստաբան՝ մարզային համակարգողի գրավոր առաջարկով.

- 6) երկու կամ ավելի անչափահաս երեխաներ ունեցող փաստաբաններին՝ ոչ ավել, քան 15 (տասնհինգ) փաստաբան: Այս խմբում նախապատվությունը տրվում է առավել շատ երեխա ունեցող, իսկ երեխաների հավասար քանակի դեպքում՝ տարիքով կրտսեր երեխա ունեցող փաստաբաններին:
- 7) 44 օրյա պատերազմի ընթացքում զոհված ընտանքի անդամ ունեցող, ռազմական դրության պայմաններում պարտադիր կամ կամավոր կարգով զորահավաքին և ռազմական գործողություններին մասնակցած փաստաբաններին՝ **ոչ ավել, քան 20 (քսան) փաստաբան:**
8. Սույն կարգի 7-րդ կետում նշված խմբերից որևիցե մեկում սահմանված քանակը չհամարվելու դեպքում, այն կարող է համարվել մյուս խմբերի չափանիշներին համամասնատասխանող փաստաբանների թեկնածուների ցանկից: Տարբեր խմբերի պահանջներին բավարարող փաստաբանը կարող է Շահառու հանդիսանալ միայն մեկ խմբի համար: Սույն կարգի 7-րդ կետով նախատեսված խմբերում հաշվառման նախապատվությունը տրվում է նախկինում Բարերարի նվիրաբերությունից չօգտված փաստաբաններին: Շահառու չի կարող լինել այն փաստաբանը, ով հանդիսանում է Փաստաբանների պալատի աշխատակից կամ մարմնի անդամ, բացառությամբ սույն կարգի 7-րդ կետի 7-րդ ենթակետով նախատեսված դեպքերի:
9. Շահառու կարող է լինել սույն կարգի 7-րդ կետի պահանջներին բավարարող այն փաստաբանը, ով **մինչև 2022 թվականի հուլիսի 7-ը** դիմել է Հանձնաժողովին և Հանձնաժողովի կողմից ընդգրկվել է Շահառուների ցուցակում:
10. Շահառու հանդիսացող փաստաբանի արտոնագիրը կասեցնելու կամ դադարեցնելու դեպքում՝ կասեցման կամ դադարեցման պահին չմարված կանխավճարի չսպառված մնացորդը փոխանցվում է սույն կարգին համամասնատասխան որոշված մյուս փաստաբանին: Սույն կանոնը գործում է նաև այն դեպքում, երբ Շահառու հանդիսացող փաստաբանը անդամավճարից լրիվ կամ մասնակի ազատվելու արտոնություն է ձեռք բերում:
11. Շահառուների ցուցակի հիման վրա Շահառուին հանձնվում է «**փաստաբան Եզեզեյանի 2022-2023 թվականների օժանդակություն**» անվանակարգով հավաստագիր:

* * *

III. ԵԶՐԱՓԱԿԻՉ ԴՐՈՒՅԹՆԵՐ

12. Սույն կարգն ուժի մեջ է մտնում 2022 թվականի հունիսի 21-ին:
13. Սույն կարգով նախատեսված Շահառուների ցուցակը Հանձնաժողովի կողմից Պալատի ֆինանսական տնօրենի հաստատմանը պետք է ներկայացվի մինչև 2022 թվականի հուլիսի 10-ը:
14. Սույն կարգը կարող է փոփոխվել կամ լրացվել Պալատի նախագահի որոշմամբ:

* *